

禮
記
章
句

禮記章句卷三十二

船山遺書十三

衡陽王夫之譔

表記

表者植木爲標以測高下淺深之度者也凡爲坊者必先立表以爲之則表雖無與於坊而爲坊之所自出是坊末而表本也以禮坊民猶踰之旣不可以坊爲無益而廢之亦不可更峻其坊而束民以不堪則惟反躬自治以正其表斯正己之盡而物可得而正矣故三代以禮坊民而踰之也率在末君失德之世則知表之爲重而亦不可咎坊之徒勞矣二篇皆游夏之徒引所傳

聞夫子之言以發端而雜引詩書以證之其辭悉得之
口授斷章擧括文或不純要爲修己治人之顯道不可
以辭害之也凡五十一章

子言之歸乎君子隱而顯不矜而莊不厲而威不言而信
稱子言之者挈其大綱謂聖人之言如此而凡所引伸
皆斯言之義也隱顯以出處言矜以莊示人厲以威加
物也夫子周流而道不行乃反而信其自得之理不必
施之政教而但盡其躬行之實自彊不息合於天德時
行物生之妙默成於己而天下萬世之興起變化皆自
此出所謂不疾而速不行而至也

右第一章 此章言修身存誠之德爲表正萬物之本
其下八章雜引孔子之言以申此章之意

子曰君子不失足於人不失色於人不失口於人

以上孔子之言不失者人不得而摘其過也足進退之
節也口言也君子之言貌非徒欲示人以無失而純於
敬者自無過之可議也

是故君子貌足畏也色足懾也言足信也

貌身容色面容敬盡於己則人自敬信之

甫刑曰敬忌而罔有擇言在躬

甫書作呂甫國也呂姓也忌懾也懾人之見譏罔有擇

言者言皆中理人不能揀擇其得失也在躬猶居身

右第二章

子曰禘襲之不相因也欲民之毋相瀆也

一事而各有節或禘或襲不偷循其便而必中於禮民不得而褻之矣言君子之於敬無斯須之或亂也

右第三章

子曰祭極敬不繼之以樂朝極辨不繼之以倦

樂禮各反朝直遙反

極盡也繼終也辨治也祭雖獻酬交錯而意不在歡朝廷之事雖煩勞而威儀必整皆篤敬以厚其終也

右第四章

子曰君子慎以辟禍篤以不揜恭以遠恥

辟毗義反
遠于顛反

揜蓋覆也立志敦篤所行皆實直行而無蓋覆以辟譏
非也君子於禍患毀謗恥辱之至無規避之術惟盡其
誠敬而已蓋處變而惟不失其敬也

右第五章

子曰君子莊敬日強安肆日偷君子不以一日使其躬儻
焉如不終日

儻弱貌如不終日如不能待一日之終也莊敬則志嚴
志嚴攝氣氣以充體斯日強矣安肆而偷則耳目墮筋
骸弛終日之閒如無所措手足而懣懣以待盡故敬者

王者以之祈天永命君子以之修身立命學者能體驗
而有得焉則近世儒者竊道士胎息之說以言學其陋
見矣

右第六章

子曰齊戒以事鬼神擇日月以見君恐民之不敬也

齊側皆反

見賢通反

擇日月者初委贄見君筮吉日也二者皆先事為期豫
戒以蓄敬而專致之一日也

右第七章

子曰狎侮死焉而不畏也

下習玩之則雖殺人立威而人亦不畏之言御不之必以敬也

右第八章

子曰無辭不相接也無禮不相見也欲民之毋相褻也

此一節孔子之言辭主人請事而客荅也接謂摯介相傳禮客執贄主人拜辱也君子盡禮以相敬於上民乃尊嚴而不敢玩

易曰初筮告再三瀆瀆則不告

告如字古沃反三蘇暫反

瀆則接神不以禮而神厭之言神人一理不可不敬也
右第九章 凡上八章皆言君子立敬之道以申首章

之義而爲一篇之綱領傳曰敬者德之輿也存敬以立本則涵德於中而仁義忠信之大用逢原而日生君子建極以爲民表之道備矣周子曰聖王以敬爲修身立政之本此之謂也

子言之仁者天下之表也義者天下之制也報者天下之利也

表者物所望而歸之之謂利謂交相勸以趨於善也宜民之道必體民情故仁以綏之義以裁之而尤敦報施之義以達人情而使獲爲善之利斯王道之所以易從而教無不行也

右第十章 前九章既言坊民之本立敬以作則此又
言施於民者必盡其理而達其情而後教化可行蓋前
以君德言而此以君道言其下四章皆以申明此章之
意

子曰以德報德則民有所勸以怨報怨則民有所懲

此一節孔子之言以怨報怨如其怨而報之卽所謂直
也君子之於怨審其可怨不可怨而已矣義之所得怨
者而矯情以忘之斯匿怨之所以可恥也

詩曰無言不讎無德不報

讎荅也此雖人情之常而亦理之所不爽君子不拂人

情而順行之所以維禮教之窮而使自勸懲也

大甲曰民非后無能胥以寧后非民無以辟四方

大他蓋反

辟爲之君也上之惠下下之奉上仁義之理也而報施之道存焉則報爲天下之利益可見矣

子曰以德報怨則寬身之仁也以怨報德則刑戮之民也仁當從鄭氏作民寬身謂安身求容刑戮謂眾叛親離而陷刑戮也二者雖有過不及之分要皆不酌報施之宜而悖人情以退天下之利也

右第十一章

子曰無欲而好仁者無畏而惡不仁者天下一人而已矣

是故君子議道自己而置法以民

好呼報反
惡烏路反

天下一人惟體仁之君子能之非民所及也承上章而言報以順民情而利勸懲之用君子通愚賤之志以置法不以己之不望報而欲施仁者槩如之則亦義之所宜而廣興仁之效也

右第十二章

子曰仁有三

安仁利仁強仁也

與仁同功而異情與仁同功其仁未可知也與仁同過然後其仁可知也

強仁者時與仁者同功而情繫利害則與仁者無欲無
畏之情異矣安仁利仁者雖以仁得過而不辭故過而
與仁者同然後信其仁也

仁者安仁知者利仁畏罪者強仁

知珍義反
強其兩反

安仁者知仁爲性之德而恆存無逆也利仁者歆仁道
之美而順行之也強仁者心非其所悅而矯情以從厚
也

右第十三章 此章引孔子之言以申上章天下一人
之意言君子議道自己必安利於仁而雖過不辭若其
置法以治民則俾其畏罪強仁而亦與仁同功矣此所

以通報施而利勸懲也

仁者右也道者左也仁者人也道者義也

仁者愛之施道者責人以所當盡者也右順而利之也左屈而成之也仁者體人之情而因民以置法民之所順也道者議之自己以裁物而匡其不義民之所難也厚於仁者薄於義親而不尊厚於義者薄於仁尊而不親厚薄猶言過不及也仁義並行則尊親兼得矣

道有至句義有考至道以王義道以霸考道以爲無失舊

道有至下闕一有字今從本文王子放反

道以制天下義之事也然義之至者仁亦至焉則順民

之情而法在其中斯仁義兼至矣如報施順情而勸懲
寓焉是已若道壹於義則名爲義而不得爲道之至矣
既專於義則有率義而行者亦有不能喻義而依仿考
據以立法者道愈降矣王者以仁行義並行不悖霸者
聲義正物以義爲道而已其下者考於義以爲道幾以
寡過而過卒不可免故防民而民猶踰之也

右第十四章

子言之仁有數義有長短小大中心慤怛愛人之仁也率
法而強之資仁者也

強其
兩反

此一節孔子之言慤隱痛怛驚悼資借也仁義之施所

及各有量惟根心以出則立之有原行之委曲詳盡斯所及者廣而可久若資成法勉強而牽循之則不能遠及矣

詩云豐水有芑武王豈不仕詒厥孫謀以燕翼子武王烝

哉數世之仁也

翼羊吏反俗本無武王烝哉句

豐水在今陝西渭南縣芑枸杞仕事也言武王勤於立國安民之事也燕安也翼覆也烝君也言得君天下之道也武王中心仁愛故澤及後世也

國風曰我今不閱皇恤我後終身之仁也

國風邶風今詩作躬閱顧也皇暇也勉強資仁則終身

爲慮而況及後世乎

右第十五章 此章承第十章仁者天下之表而言其
下四章皆以申明此章之意章首兼言義之長短大小
則又以起第二十章以下之意讀者參觀之而此篇之
脈絡貫通者可知矣

子曰仁之爲器重其爲道遠舉者莫能勝也行者莫能致
也取數多者仁也夫勉於仁者不亦難乎

勝書蒸反
未防無反

此一節孔子之言仁以函載萬物而無有閒斷統四端
兼萬善是以難也

是故君子以義度人則難爲人以人望人則賢者可知已

矣

度徒落反以人之
人蓋仁字之誤

度較量也望猶觀也義有成制考道者可以不失難爲
人言難於知人也仁則必根心之憊怛以立愛而後可
以任重而行遠若但率法以施惠則雖勉爲之而終有
莫能勝莫能致者以此觀人而賢者乃見也

右第十六章 上章以仁義並言而此章之詞有抑揚
者蓋仁者君道之極而爲天下之表義則猶近乎坊之
事也

子曰中心安仁者天下一人而已矣

此一節孔子之言安仁則私欲淨盡天理流行中心憊

但自行乎其所不容已聖人仁覆天下之本也

大雅曰德輶如毛民鮮克舉之我儀圖之唯仲山甫舉之

愛莫助之

鮮息
淺反

輶輕也儀想像也圖思維也愛謂愛之者仁含於性之德而不倚於物故言其輕猶書言道心惟微也舉是德者一繇其中心之安故雖有愛之者莫能相助也

小雅曰高山仰止景行行止子曰詩之好仁如此鄉道而

行中道而廢

好呼報反
鄉許亮反

景行大路也如此謂僅能如此也夫子論詩而言以仁為高山景行而仰且行之亦可謂好仁矣然非其中心

之安則高不易登遠不易至中道而必廢此資仁者之不能至於仁也

忘身之老也不知年數之不足也俛焉日有孳孳斃而後已

記者引夫子之言而伸之以爲苟能如此則雖勉仁之事亦可馴至乎安所謂力行近乎仁也

右第十七章

子曰仁之難成久矣人人失其所好故仁者之過易辭也

好呼
報反

所好謂可好者孟子所謂民之秉夷也仁難成而人不

能成故所行皆拂乎人心而無往非過苟能自勉於仁則雖有過而非天下之公惡易於免矣

子曰恭近禮儉近仁信近情敬讓以行此雖有過其不甚矣

此一節又孔子之言儉節制也不侈欲而放其心近於仁矣情實也禮者仁之用情者仁之體行此三者而尤以敬讓將之或有時施非所當而成乎過恭過儉過信亦不大違於道此所以其過易辭也

夫恭寡過情可信儉易容也以此失之者不亦鮮乎

夫防無反

鮮息
淺反

過謂失人情也情可信者信近情而人亦可信諒之也
易容謂不爲物所忌釋夫子之言而明其有過之易免
也

詩云溫溫恭人惟德之基

溫溫敬讓之容能恭則行自有節而無所欺僞則又儉
與信之基也凡此皆勉仁之事雖未至於安仁而固可
以寡過志於仁者所以忘年而日孳孳也

右第十八章

子曰仁之難成久矣唯君子能之

此一節孔子之言

是故君子不以其所能者病人不以其所不能者愧人
是故聖人之制行也不制以己使民有所勸勉愧恥以行
其言制行之行
胡孟反

病迫責之使行也制行制民之行言教令也仁難成故
不以急責之民惟君子能之則不可不自盡於己故制
民之行不期其卽仁而特敦仁於躬任重致遠使民見
上之所爲根心達外因以感發興起恥爲不仁則教令
大行而坊不踰矣

禮以節之信以結之容貌以文之衣服以移之朋友以極
之欲民之有壹也

容貌儀度也文飾也移者易其耳目肢體之觀以變其
淫陋也極聚也如屋之聚於棟也壹純也身心內外無
非善道以爲之涵養而無雜也君子仁成於己而推致
仁道之用以薰陶涵泳其民則雖不急責以心德之事
而默移潛化必世之仁自此而臻矣

小雅曰不愧于人 不畏于天 是故君子服其服則文以君
子之容有其容則文以君子之辭 遂其辭則實以君子之
德 是故君子恥服其服而無其容 恥有其容而無其辭 恥
有其辭而無其德 恥有其德而無其行 是故君子哀經則
有哀色 端冕則有敬色 甲冑則有不可辱之色 詩云維鵜

在梁不濡其翼彼記之子不稱其服

行胡孟反復倉
同反稱昌孕反

遂成也端冕賓祭之服鵠鵠鳥食魚梁魚柝鵠貪魚
雖不濡翼不可以爲潔也記詩作其指辭也此言人君
能動民愧恥之心則卽其衣服言動之間皆有以反躬
自省而遠於不仁而可進於君子之道矣然必躬行於
上者根心仁愛而德孚於下乃足以入之深而感之至
不然則雖衣服容止辭令授之以制而民之不稱者多
矣此維鵠之詩所以刺也

右第十九章

子言之君子之所謂義者貴賤皆有事於天下天子親耕

柔盛拒鬯以事上帝故諸侯勤以輔事於天子

盛是征反

義之體敬也其用宜也盡其職分之所當為以敬其所尊乃所以為天下之制也人君以義制天下必先自修其義於上故天子諸侯各盡敬於所尊以為民極而非徒立法制以防民也

右第二十章 此章承第十章義者天下之制而言其下二章皆以申明此章之意

子曰下之事上也雖有庇民之大德不敢有君民之心仁之厚也

此一節孔子之言仁之用愛故為君道義之體敬故為

臣道仁之厚者謂愛君之至也

是故君子恭儉以求役仁信讓以求役禮

役爲也信讓誠乎讓也恭儉信讓皆義之事義以爲質而仁禮行矣

不自尙其事不自尊其身儉於位而寡於欲

尙猶先也不自尙其事先公而後私也儉於位辭尊而就卑也此恭儉之德也

讓於賢卑己而尊人小心而畏義

此信讓之德也

求以事君得之自是不得自是以聽天命

求自求也言但求盡其事君之道而無求也自繇也是此也謂此恭儉信讓之道窮通一致無所改易而得失皆安於命惟其義而已

詩云莫莫葛藟施于條枚凱弟君子求福不回其舜禹文王周公之謂與有君民之大德有事君之小心施羊吏反弟特計反

莫莫茂密貌條枝枚幹也回邪也葛藟緣木而木無望緣之心福自集於君子而君子無貪福之志舜禹終受禪讓文王周公之老於臣服其心一也

詩云惟此文王小心翼翼昭事上帝聿懷多福厥德不回

以受方國

翼翼敬也昭事者心迹昭著可對於天無微福之志也
聿語辭懷者上帝所眷也帝命已集而文王終無欲得
之志三分有二率以事殷文王所以厚其仁而盡其義
也

右第二十一章

子曰先王諡以尊名節以壹惠恥名之浮於行也

行胡孟反

此一節孔子之言尊崇也節謂節取之壹與一通惠善
也浮過也諡雖以崇獎榮名而卽有眾善節取其一行
之大者不爲繁稱蓋欲使行有餘而名不足也死而尊

之者且然則生而不敢猶譽益可知也

是故君子不自大其事不自尙其功以求處情過行弗率以求處厚彰人之善而美人之功以求下賢是故君子雖

自卑而民敬尊之

行胡孟反
下胡駕反

情實也過行過高絕俗之行率循也爲也處厚者不欲以己之高形人之短美贊美之也凡此皆信讓之德

右第二十二章

子曰后稷天下之爲烈也豈一手一足哉唯欲行之浮於

名也故自謂便人

行胡孟反

烈功烈也使人謂習熟便爲之詩所謂誕實匍匐以就

口實也。后稷之德，言德行見於虞書，則所以贊襄舜禹，化成天下者，豈僅勤手足以躬稼哉？乃欲致實行而不居盛美，故自謂爲便習稼穡之人，而典樹藝之教，以一官此則恭儉信讓而爲義之至也。

右第二十三章

子言之：君子之所謂仁者，其難乎？詩云：凱弟君子，民之父母。凱以強教之，弟以說安之，樂而毋荒，有禮而親，威莊而安，孝慈而敬，使民有父之尊，有母之親，如此而后，可以爲民父母矣。非至德，其孰能如此乎？弟特計反，強如字，舊音其兩反者，非說代雪反。此一節孔子之言，強教剛克之意，毋荒有禮，莊敬強教。

之效也樂親孝慈說安之效也奉其教則父道也蒙其安則母道也君道以仁爲主而仁之至者義必盡焉並行不悖而經緯咸宜矣至德卽第十四章至道之意

今父之親子也親賢而下無能母之親子也賢則親之無能則憐之母親而不尊父尊而不親水之於民也親而不尊火尊而不親土之於民也親而不尊天尊而不親命之於民也親而不尊鬼尊而不親

下抑也水爲功於人而可狎母道也火明照萬物而不可近父道也土利萬有而人踐之母道也天覆物而與人遠父道也尊親之道並至爲難父母水火天地不能

兼備惟王者愛敬合德因時而利導之體生成化育之
理發政施令以悅安之尊鬼施敬以強教之仁義並行
迭相主輔而其末流所趨猶不能無偏如下章所云者
宜君子之於仁難言之也

右第二十四章 前章以上既分言君臣仁義之道此
章因君道之仁而廣言之推質文之同異以明仁義合
而仁斯至乃能盡君道而爲天下之表其下五章雜引
孔子之言以申此章之意

子曰夏道尊命事鬼敬神而遠之近人而忠焉先祿而後
威先賞而後罰親而不尊其民之敝翫而愚喬而野朴而

不文

遠于願反近其
謹反喬舉鳩反

尊命勤民事也鬼者神之魄神者鬼之靈祭祀之事盡
人道以事鬼至於靈爽之降吉凶者則遠之不用之以
立教也近人達人情也忠盡愛也常願曰祿特賜曰賞
責怒曰威刑贖曰罰蓋仁先而義後也民之敝謂政教
衰失之後蠢慝也喬傲也朴質也勤人事而不恤敬忌
故其敝如此

殷人尊神率民以事神先鬼而後禮先罰而後賞尊而不
親其民之敝蕩而不靜勝而無恥

率鬼者邀其已往而致其愛敬事神者迎其方來而尊

其嚮威率民事神所以尊而不親也禮謂人相接之禮
蕩者崇無而流不靜多懼而不甯也勝猶競也尙刑罰
則民競於爭無恥刑罰不能格心也

周人尊禮尙施事鬼敬神而遠之近人而忠焉其賞罰用
爵列親而不尊其民之敝利而巧文而不慙賊而蔽

尙施卽第十章之所謂報仁之尤近人情者也賞罰用
爵列者賞先於親與貴而罰則議減也利便利謂嫻習
儀節巧飾也文而不慙情不稱文行之無慙也賊害也
刑賞厚於親貴人生伎害也蔽欺蔽不畏刑罰故相欺
蔽也三代王者備至德於躬推行立法仁義質文初無

偏用但以因時制宜微示先後而後世德衰成法存而失其精意則其弊必至於此蓋大道含宏而理致微妙低昂之間稍有所移則勢必旁趨而背其相通之妙此舜所以極言道心之微非精一不能執中而上章以君子之仁爲難皆此理也

右第二十五章

子曰夏道未瀆辭不求備不大望於民民未厭其親殷人未瀆禮而求備於民周人強民未瀆神而賞爵刑罰窮矣

強其兩反

瀆用之頻而熟也辭命令也夏道尊命政令一成而不

數爲更易故政簡而無過求於民雖親過於尊而民猶不厭殷人後禮其禮不煩而政令煩數責民嚴重則雖尊之而實厭矣周禮繁重有非民所任而強之者特其敬神而遠之猶未瀆也乃強民而民不能率則賞罰煩用而窮矣仁義本無偏勝之弊因煩用而失之二代懲前事之弊而不瀆於彼者且窮於此所以屢降愈下蓋矯枉過直其勢然也

右第二十六章

子曰虞夏之道寡怨於民殷周之道不勝其敝勝書
瀆則敝敝則民歸咎於法之不善而怨繇之以生矣然反

右第二十七章

子曰虞夏之質殷周之文至矣虞夏之文不勝其質殷周之質不勝其文

勝書
絜反

先王創制顯庸皆仁至義盡而酌乎時之宜或質或文於道俱至而法制已立後人承之能用其數而不能體其德故崇質者文不能副尙文者質不能充則成乎偏敝矣然文不勝質質有餘而文無難於繼起質不勝文則文具而質僞矣此夫子抑揚之旨也夏尙忠殷尙質周尙文而此云夏質而殷文者蓋忠非無質之忠而特其質未備殷人制度文爲皆已備盡周人非有增益而

殷人崇用周人崇飾所以自周言之則殷爲質自虞夏言之則殷爲文也

右第二十八章

子言之曰後世雖有作者虞帝弗可及也已矣

言之二字術文

作者謂三王也此一節孔子之言而下則記者推其弗可及之實也

君天下生無私死不厚其子子民如父母有憫怛之愛有忠利之教親而尊安而敬威而愛富而有禮惠而能散利順也忠利謂盡於己而順於民安不擾也敬不瀆也富有天下而能以禮制之也惠而能散惠不偏也帝舜

之德大公無私故仁義之發皆根所性之實斯以尊親
道合而爲德之至也

其君子尊仁畏義恥費輕實

恥費輕實上闕其小人三字

費奢也實利也恥費輕實則儉以寡過而非吝於利也
帝舜大公至正之德施於教愛而臣民化之也

忠而不犯義而順

忠盡愛敬之實以事上也義以制自裁而不踰節也此
化之行於小人者也

文而靜寬而有辨

文而靜則有禮而不煩寬而有辨則相親而不瀆此化

禮記章句卷三十一
三
之行於君子者也惟舜之德教以至仁而大義故其化如此

甫刑曰德威惟威德明惟明非虞帝其孰能如此乎
德至而教自行仁所以爲天下之表也

右第二十九章

予言之事君先資其言拜自獻其身以成其信是故君有
責於其臣臣有死於其言故其受祿不誣其受罪益寡
資其言者自陳其所能爲以爲受祿之資也拜進見於
君也獻其身致其身也成其信踐其所陳也君因其所
陳而責之則非強其所不能而受罪益寡臣必踐其言

不足則以死繼之則受祿於君非誣矣君子之所以立身事君者忠信而已忠以事君而必敦其信信以交友而必本於忠皆所以實盡其義也

右第三十章 此章因臣道之義而極言以發明忠信之理義者忠信之則忠信所以盡義也蓋居上而立表以正民乃君與大臣之事故道異而先於正己則一也其下十六章雜引孔子之言皆以申明此章之意

子曰事君大言入則望大利小言入則望小利故君子不以小言受大祿不以大言受小祿

此一節孔子之言大言陳國家之大道小言一官一職

之議也利謂行之而利於國也小言所望於見功者小不敢受大祿而曠其大大言所望者大苟受小祿則志道不行而徒爲枉己爾

易曰不家食吉

祿如其望則出必有功而吉矣

右第三十一章

子曰事君不下達不尙辭非其人弗自

此一節孔子之言下達謂君求賢之令達於下也尙進也辭先資之言也君不下達則不進言以求仕也自所繇以進也非其人謂因嬖倖以進

小雅曰靖共爾位正直是與神之聽之式穀以女

共九容反女人

靖安也共敬也式用也穀善也安位無求自虔其職而不交匪人則忠直孚於鬼神而無不善矣君子之義難進易退而已難進易退則自不屑與佞倖通而所交者無非正人其迹雖若疏遠於君以自樹聲氣而實乃忠愛之至庸主不察斥爲朋黨則小人得以肆其攻擊而國之敗亡必繇是而起漢唐以下二千年間覆軌相因如出一轍誦是詩者不能不爲之潸然流涕也

若第三十二章

子曰事君遠而諫則調也近而不諫則尸利也

調與諸同

遠官守在外者近廷臣也調謂恐君忘己因事自達以結知也尸如祭之尸無事而坐食君之利祿也

右第三十三章

子曰邇臣守和宰正百官大臣慮四方

邇臣近侍之臣守和謂從容調和君德宰冢宰正者疏其流品審其殿最大臣六官之長慮謀也人臣各修其職而無越思忠信以事君之道也

右第三十四章

子曰事君欲諫不欲陳

欲猶當也陳謂揚君之過於外

詩云心乎愛矣瑕不謂矣中心藏之何日忘之

瑕何也謂告也愛則必忠告之不容已於諫矣然必藏之心而不暴之於外非但以爲君諱過抑其憂深思切自不欲以言語謝其責也

右第三十五章

子曰事君難進而易退則位有序易進而難退則亂也

此一節孔子之言有序無躐等也亂謂紊亂禮制

故君子三揖而進一辭而退以遠亂也

遠于顯反

此卽入朝之禮言之出入升降之間而不苟進之義寓

焉則進而受祿退而致政其爲禮義之大者愈可知矣

右第三十六章

子曰事君三違而不出竟則利祿也人雖曰不要吾弗信

也

竟居影反

違已也利祿利其祿也要干求也

右第三十七章

子曰事君慎始而敬終

慎始不輕進也敬終雖不見用必盡臣禮而去也

右第三十八章

子曰事君可貴可賤可富可貧可生可殺而不可使爲亂

不以廢黜死亡之故而懟君以從逆也

右第三十九章

子曰事君軍旅不辟難朝廷不辭賤處其位而不履其事

則亂也

辟毗義反難奴案反朝直遙反

此一節孔子之言亂謂逆命干法

故君使其臣得志則慎慮而從之否則孰慮而從之終事而退臣之厚也

得志謂己所當為與可為者慎慮不自謂能猶必加慎也否謂強己以非所堪也孰與孰通孰慮者素非所習尤須詳審也終事而退君不見知且畢其事不辭勞而

已義不可留也全身而不逆君命厚之至也

易曰不事王侯高尚其事

終事而退則可以高尚矣

右第四十章

子曰唯天子受命于天士受命于君

此一節孔子之言命貴賤生殺之制也士自諸侯達於士也君代天而司命臣皆受焉故君尊如天不可違也故君命順則臣有順命君命逆則臣有逆命

命之順逆惟君所制順則承之逆亦安之順逆莫非命也

鵲之姜姜鵲之賁賁人之無良我以爲君

賁賁昆反

姜詩作疆賁詩作奔姜姜賁賁剛正不亂匹偶也君之
淫亂雖不如禽鳥而已爲之臣則固君矣雖怨刺之徒
失其厚而已矣

右第四十一章 此上十一章皆言忠以事君之道而
以實之信亦存其閒矣

子曰君子不以辭盡人故天下有道則行有枝葉天下無
道則辭有枝葉

此一節孔子之言辭盡人者極其辭以待人也枝葉旁
博有餘之意世治俗淳則人務實而行餘於言否則言

有餘而行不逮也

是故君子於有喪者之側不能賻焉則不問其所費於有病者之側不能饋焉則不問其所欲有客不能館則不問其所舍

皆不爲枝葉之辭以全其忠信也

故君子之接如水小人之接如醴君子淡以成小人甘以壞

接謂以辭色酬人也淡者眾味之所成甘則必變而壞矣

小雅曰盜言孔甘亂是用餽

盜言讒諛賊害之言餽進也

右第四十二章

子曰君子不以口譽人則民作忠

譽以諸反

好賢必以實則民相勸以敦實行矣

故君子問人之寒則衣之問人之饑則食之稱人之美則

爵之

衣於既反
食祥吏反

行必踐其言也

國風曰心之憂矣於我歸說

說輸內反

國風曹風說舍息也憂人之無依而令就已舍息不徒

言也

右第四十三章

子曰口惠而實不至怨菑及其身

此一節孔子之言口惠以言許人也許而不惠君子惡其欺詐小人望而不得皆致禍災之道也

是故君子與其有諾責也寧有已怨責嫌責反

責負也已拒也拒人之請而致怨過不在已諾而負之誤人而怨深矣

國風曰言笑晏晏信誓旦旦不思其反反是不思亦已焉

哉

國風衛風晏晏和也旦旦明也反覆踐其言也已焉哉

絕之之辭

右第四十四章

子曰君子不以色親人情疏而貌親在小人則穿窬之盜也與與以諸反

君子雖所親厚莊敬愿恪不失其度若令色悅人而心不然使其為小人則必為穿窬以其用心之陰賊也

右第四十五章

子曰情欲信辭欲巧

巧當作考謂徵實以立言也

右第四十六章 此上五章皆言信以接眾之道而盡

己之忠亦存其閒蓋忠信本合以戒用而爲盡義之本
非是則假義制物而義非其義矣

子言之昔三代明王皆事天地之神明無非卜筮之用不
敢以其私褻事上帝

此一節孔子之言卜謂卜日及牲以承祭兼言筮者小
祀用筮私謂己之私意非卜筮則惟己之便而妄億神
明之享不敬甚矣

是故不犯日月不違卜筮卜筮不相襲也大事有時日小
事無時日有筮外事用剛日內事用柔日不違龜筮

日剛日柔日月如冬至郊之類不犯不過也因氣至之

類而求之也不違者從則祭不從則免不相襲者卜則
不筮不敢瀆也大事郊禘小事羣小祀有時日以其時
日卜也無時日卽卜筮以爲時日也外事天神地祇內
事宗廟剛日甲丙戊庚壬柔日乙丁己辛癸不違龜筮
者言雖有時日猶必卜筮若上辛不吉則用次辛也
右第四十七章。此章承第三十五章敬神事鬼之義
而言君子主敬以敦行仁義用爲民表其道旣盡而王
者父天母地以爲天下君大觀在上神道設教幽明之
治初無二理故殷人尊神以爲道雖過則偏而實爲本
天治人者之所不可廢故就祭祀卜筮以明之其立言

之旨雖若視以上諸章之義爲緩而明之禮樂幽之鬼神本爲一致乃盡性致命承天子民之至德非末世妖妄術數之可與誠不可以爲迂而置之也其下四章雜引孔子之言皆以申明此章之意

子曰牲牲禮樂齊盛是以無害乎鬼神無怨乎百姓齊即夷反

盛是征反

害違也此章蓋有闕文謂備物盡敬動不違時而神人咸宜也陳氏合前章第二節以曲爲之說於義未通
右第四十八章

子曰后稷之事易富也其辭恭其欲儉其祿及子孫

此一節孔子之言事祀事富備也君耕藉養牲夫人親
桑誠盡於己而不求多於臣民故易備也辭祝辭恭不
侈備物也欲儉者無徼福之心也祿猶福也及子孫者
所謂子孫勿替引之也蓋后稷立國之始其制如此而
周人世遵用之也

詩曰后稷兆祀庶無罪悔以迄于今

兆詩作肇始也庶無愼言之之辭迄于今謂至今因之
此周道尊神而事之不敢以私褻也

右第四十九章

子曰大人之器威敬

此一節孔子之言大人居大位者器所守以交於神明者如元龜泰著祭器之類威與畏通威敬尊重之不曠用也

天子無筮

龜惟神謀而筮參人謀故春秋傳曰筮短龜長天子有事則卜而不筮

諸侯有守筮

在國曰守諸侯大事卜小事筮兼用其短者於器爲輕矣

天子道以筮

道在塗也以用也天子守龜不出在道惟用筮

諸侯非其國不以筮

守筮藏之大廟視天子之守龜不以出疆在道不筮

卜宅寢室天子不卜處大廟大也蓋反

宅居也寢室內寢改作移居則卜之處大廟者賓祭大

事處之不卜而行也凡此皆威敬而不黷也

右第五十章

子曰君子敬則用祭器是以不廢日月不違龜筮以敬事

其君長是以二字衍文長丁丈反

此一節孔子之言敬所敬也謂饗大賓及冠禮祭器尊

彝俎豆之屬不廢日月始見君必擇日也不違龜筮卜筮吉而後仕也長謂家臣於大夫日月龜筮祭則用之出事君長等之於事鬼神所以爲敬二者皆通敬神之道以敬人也

是以上不瀆於民下不褻於上

尊所事而敬之如神則示民以不可瀆而民莫敢不敬矣

右第五十一章

禮記章句卷三十二終